

Visoki predstavnik insistira na povećanju izvoza

Visoki predstavnik, Paddy Ashdown, u ponedjeljak je upozorio da će se BiH suočiti sa bankrotom ukoliko njena zakonodavna tijela ne počnu hitno usvajati i provoditi ekonomske reforme. "Pomoć opada, dugovi se gomilaju a investicije ne pritižu," visoki predstavnik je rekao prisutnima u Holiday Inn hotelu u Sarajevu, gdje su Evropska unija i OHR predstavili brošuru čija je tema zapošljavanje, pod nazivom "Djelom do novih radnih mjesta", a EU je najavila pokretanje druge faze angažovanja njenih sredstava za brzo djelovanje, u okviru kojih se obezbjeđuje materijalna pomoć i konsultacije za novoosnovana preduzeća. Na ovom skupu također je odati priznanje uspješnim bosanskohercegovačkim poduzetnicima.

"U prvih sedam mjeseci ove godine trgovinski deficit je iznosio preko 3 milijarde KM," ustvrdio je visoki predstavnik. "U istom periodu uvozili smo skoro četiri puta više nego što smo izvozili. Ovo je očito neodrživo."

Rekao je da je međunarodna pomoć jedino što BiH spašava od bankrota – a ona će i sama početi naglo da opada. "Jedini način da ova zemlja izbjegne ozbiljnu ekonomsku krizu u narednim godinama je provođenje ozbiljnih strukturalnih reformi kako bi se otvorila nova radna mjesta, povećale investicije a ekonomija koja se zasniva na pomoći pretvorila u ekonomiju zasnovanu na izvozu," rekao je visoki predstavnik.

Istakao je da nove vlasti moraju provesti reforme koje su potrebne za podsticanje investicija, stimuliranje rasta, stvaranje radnih mjesta, i iznad svega, okrenuti ekonomiju ove zemlje ka izvozu – ili se u suprotnom suočiti sa neminovnim i ogromnim smanjenjem potrošnje kao i ozbiljnim i dugotrajnim ekonomskim kolapsom.

“Stoga moramo dramatično pojačati tempo reforme,” rekao je visoki predstavnik. “I zato je toliko važno da vlasti na višim nivoima, na entitetskom i državnom nivou, ispune svoj dio obaveza stvaranjem okruženja koje će stimulirati razvoj poduzetništva, koje nagrađuje marljiv rad, privlači investicije i olakšava trgovinu.”

S druge strane, visoki predstavnik je skrenuo pažnju na rad tzv. “buldožer komisije”, koja je oformljena sredinom novembra, i čiji je zadatak identificiranje i uklanjanje propisa koji sprečavaju otvaranje novih radnih mjesta, i koji predstavljaju ostatke stare, planske privrede. “Potrebni su brzi pomaci na uvođenju PDV-a umjesto nepravednog poreza na promet, i stvarni pomaci u reformiranju carinskog sistema podložnog korupciji,” rekao je. “A iznad svega nam je potreban izvoz, izvoz, izvoz.”